

周書

一  
函  
六  
冊

周書卷八

帝紀八

靜帝

靜皇帝諱衍後改爲闡宣帝長子也母曰朱皇后建德二年六月  
生於東宮大象元年正月癸卯封魯王戊午立爲皇太子二月辛  
巳宣帝於鄴宮傳位授帝居正陽宮二年夏五月乙未宣帝寢疾  
詔帝入宿於露門學己酉宣帝崩帝入居天臺廢正陽宮大赦天  
下停洛陽宮作庚戌上天元上皇太后尊號爲太皇太后天元聖  
皇太后李氏爲太帝太后天元大皇后楊氏爲皇太后天大皇后  
朱氏爲帝太后其天中大皇后陳氏天右大皇后元氏天左大皇  
后尉遲氏竝出俗爲尼柱國漢王贊爲上柱國右大丞相上柱國  
揚州總管隋國公楊堅爲假黃鉞左大丞相柱國秦王贊爲上柱

國帝居諒闇百官總已以聽於左大丞相王子上柱國鄖國公  
韋孝寬爲相州總管罷入市稅錢六月戊午以柱國許國公宇文  
善神武公竇毅修武公侯莫陳瓊大安公閭慶竝爲上柱國趙王  
招陳王純越王盛代王達滕王迥來朝庚申復行佛道二教舊沙  
門道士精誠自守者簡令入道辛酉以柱國杞國公椿燕國公于  
寔邵國公賀拔伏恩竝爲上柱國甲子相州總管尉遲迴舉兵不  
受代詔發關中兵卽以孝寬爲行軍元帥率軍討之上柱國畢王  
賢以謀執政被誅以上柱國秦王贇爲大冢宰杞國公椿爲大司  
徒己巳詔南定北光衡巴四州民爲宇文亮抑爲奴婢者竝免爲  
民復其本業甲戌有赤氣起西方漸東行遍天庚辰罷諸魚池及  
山澤公禁者與百姓共之以柱國蔣國公梁睿爲益州總管秋七  
月甲申突厥送齊范陽王高紹義庚寅申州刺史李慧起兵辛卯

月掩氐東南星甲午月掩南斗第六星庚子詔趙陳越代滕五王  
入朝不趨劔履上殿榮州刺史邵國公宇文胄舉兵遣大將軍清  
河公楊素討之青州總管尉遲勤舉兵丁未隋公楊堅爲都督內  
外諸軍事己酉邳州總管司馬消難舉兵以柱國楊國公王諒爲  
行軍元帥率軍討之壬子歲星與太白合於張有流星大如斗出  
五車東北流光明燭地趙王招越王盛以謀執政被誅癸丑封皇  
弟術爲鄴王術爲郢王是月豫州荊州襄州三總管內諸蠻各率  
種落反焚燒邨驛攻亂郡縣八月庚申益州總管王謙舉兵不受  
代卽以梁睿爲行軍元帥率軍討之丁卯封上柱國杞罕公辛威  
爲宿國公開府怡昂爲鄴國公庚午韋孝寬破尉遲迴於鄴城迴  
自殺相州平移相州於安陽其鄴城及邑居皆毀廢之分相州陽  
平郡置毛州昌黎郡置魏州景子以漢王贊爲太師上柱國并州



總管申國公李穆爲太傅宋王實爲大前疑秦王贇爲大右弼燕  
國公于寔爲大左輔已而詔曰朕祇承洪業二載於茲藉祖考之  
休憑宰輔之力經天緯地四海晏如逆賊尉遲迥才質凡庸志懷  
姦慝因緣國屬位冠朝倫屬上天降禍先皇晏駕萬國深鼎湖之  
痛四海窮遏密之悲獨幸天災欣然放命稱兵擁眾便懷問鼎乃  
詔六師肅茲九伐而凶徒孔熾充原蔽野諸將肆雷霆之威壯士  
縱貔貅之勢芟夷縈拂所在如莽直指漳濱擒斬元惡羣醜喪魄  
咸集鼓下順高秋之氣就上天之誅兩河妖孽一朝清蕩自朝及  
野喜抃相趨昔上皇之時不言爲治聖人宰物有教而已未戢干  
戈實深慚德思弘寬簡之政用副億兆之心可大赦天下其其迥  
元謀執迷不悟及迥子姪逆人司馬消難王謙等不在赦例庚辰  
司馬消難擁其眾以魯山甌山二鎮奔陳遣大將軍宋安公元景

山率眾追擊俘斬五百餘人邛州平沙州氏帥開府楊永安聚眾  
應王謙遣大將軍樂寧公達奚儒討之楊素破宇文冑於榮州斬  
冑於石濟以上柱國神武公竇毅爲大司馬齊國公于智爲大司  
空廢相青荆金晉梁六州總管九月甲申熒惑與歲星合于翼景  
成廢河陽總管爲鎮隸洛州以小宗伯竟陵公陽慧爲大宗伯王  
晨廢皇后司馬氏爲庶人甲午熒惑入太微戊戌以柱國楊國公  
王詒爲上柱國辛丑分潼州管內新遂普合及瀘州管內瀘戎六  
州並隸信州總管府已酉熒惑犯左執法庚戌以柱國常山公于  
翼化政公宇文忻並爲上柱國進封翼爲任國公忻爲英國公王  
子丞相去左右之號隋公楊堅爲大丞相冬十月甲寅日有蝕之  
乙卯有流星大如五斗出張南流光明燭地王戌陳王純以怨執  
政被誅大丞相隋國公楊堅加大冢宰五府總于天官戊寅梁睿

破王謙於劔南追斬之傳首京師益州平十一月甲辰達奚儒破  
楊永安於沙州沙州平乙巳歲星守太微丁未上柱國鄖國公韋  
孝寬薨十二月王子以柱國蔣國公梁睿爲上柱國癸丑熒惑入  
氏丁巳以柱國邗國公楊雄爲普安公賀蘭暮邨國公梁士彥上  
大將軍新寧公叱列長又一作文武鄉公崔弘度大將軍中山公宇文  
恩濮陽公宇文述渭原公和干子任城公王景漁陽公楊銳上開  
府廣宗公李崇隴西公李詢竝爲上柱國庚申以柱國楚國公豆  
盧勣爲上柱國癸亥詔曰詩稱不如同姓傳曰異姓爲後蓋明辯  
親疏皎然不雜太祖受命龍德猶潛錄表革代之文星垂除舊之  
象三分天下志扶魏室多所改作冀允上玄文武羣官賜姓者衆  
本殊國邑實乖胙土不歆非類異骨肉而共丞嘗不愛其親在行  
路而敘昭穆且神徵革姓本爲曆數有歸天命在人推讓終而弗



獲故君臨區寓累世於茲不可仍遵謙挹之旨久行權宜之制諸  
改姓者悉宜復舊甲子大丞相隋國公楊堅進爵爲王以十郡爲  
國辛未代王達滕王迥竝以謀執政被誅王申以大將軍長寧公  
楊勇爲上柱國大司馬小家宰始平公元孝矩爲大司寇

大定元年春正月壬午詔曰朕以不天夙遭極罰光陰遄速遽及  
此辰窮慕纏繇言增號絕踰祀革號憲章前典可改大象三年爲  
大定元年乙酉歲星逆行守右執法熒惑掩房北第一星景戌詔  
曰帝王設官惟才是務人臣報國薦賢爲重去歲已來屢有妖寇  
宰臣英算咸得清蕩逆亂之後兵車始竭遐邇勞役生民未康居  
官之徒致治者寡斯故上失其道以至於茲亦由下有幽人未展  
其力今四海寧一八表無塵元輔執鈞壘風揚化若使天下英傑  
盡升於朝銓衡陟降量才而處壘拱無爲庶幾可至於是遣戎秩



上開府以上職事下大夫以上外官刺史以上各舉清平勤幹者  
三人被舉之人居官三年有功過者所舉之人隨加賞罰以大司  
馬長寧公楊勇爲洛州總管二月庚申大丞相隋王楊堅爲相國  
總百揆更封十郡通前二十郡劔履上殿入朝不趨贊拜不名備  
九錫之禮加璽鉞遠遊冠相國印綠綬綬位在諸王上又加冕十  
有二旒建天子旌旗出警入蹕乘金根車駕六馬備五時副車置  
旄頭雲罕樂舞八佾設鍾簠宮懸王后王子爵命之號竝依魏晉  
故事甲子隋王楊堅稱尊號帝遜于別宮隋氏奉帝爲介國公邑  
萬戶車服禮樂一如周制上書不爲表荅表不稱詔有其文事竟  
不行開皇元年五月壬申崩時年九歲隋志也謚曰靜皇帝葬恭  
陵

史臣曰靜帝越自幼冲紹茲衰緒內相挾孫劉之詐威藩無齊代

之彊隋氏因之遂遷龜鼎雖復岷峨投袂翻成陵奪之威漳滏勤  
王無救宗周之殞嗚呼以太祖之克隆景業未踰二紀不祀忽諸  
斯益宣帝之餘殃非孺子之罪戾也

周書卷八

帝紀八



圖書卷九

列傳第一

皇后

文帝元皇后

文宣叱奴皇后

孝閔帝元皇后

明帝獨孤皇后

武帝阿史那皇后

武帝李皇后

宣帝楊皇后

宣帝朱皇后

宣帝陳皇后

宣帝元皇后

宣帝尉遲皇后

靜帝司馬皇后

書紀有虞之德載釐降二女詩述文王之美稱刑于寡妻是知婚姻之道男女之別寔有國有家者之所慎也自三代迄於魏晉興衰之數得失之迹備乎傳記故其詳可得聞焉若娉納以德防閑以禮大義正於宮闈王化行於邦國則坤儀式固而鼎命惟永矣至於邪僻既進法度莫修冶容迷其主心私謁蠹其朝政則風化陵替而宗社不守矣夫然者豈非皇王之龜鑑與周氏率由姬制內職有序太祖創基修衽席以儉約高祖嗣膺節情欲於矯枉宮闈有貫魚之美戚里無私溺之尤可謂得人君體也宣皇外行其志內逞其欲溪壑難滿採擇無厭恩之所加莫限斯阜榮之所及

無隔險設於是升蘭殿而正位踐椒庭而齊體者非一人焉階房帷而拖青紫承恩倖而擁玉帛者非一族焉雖辛癸之荒淫趙李之傾惑曾未足比其髣髴也民厭苛政弊事寔多太祖之祚忽諸特由於此故敘其事以爲皇后傳云

文帝元皇后魏孝武帝之妹初封平原公主適開府張歡歡性貪殘遇后無禮又嘗殺后侍婢后怒訴之於帝帝乃執歡殺之改封后爲馮翊公主以配太祖生孝閔帝大統七年薨魏恭帝三年十二月合葬成陵孝閔帝踐祚追尊爲王后武成初又追尊爲皇后文帝吐奴皇后代人也太祖爲丞相納后爲姬生高祖天和元年六月尊爲皇太后建德二年三月癸酉崩四月丁巳葬永固陵孝閔帝元皇后名胡摩魏文帝第五女初封晉安公主帝之爲略陽公也尚焉及踐祚立爲王后帝被廢后出俗爲尼建德初高祖



誅晉國公護上帝尊號爲孝閔帝以后爲孝閔皇后居崇義宮隋氏革命后出居里第大業十二年殂

明帝獨孤皇后太保衛國公信之長女帝之在藩也納爲夫人二年正月立爲王后四月崩葬昭陵武成初追崇爲皇后世宗崩與后合葬

武帝阿史邲皇后突厥木杆可汗俟斤之女突厥滅茹茹之後盡有塞表之地控弦數十萬志陵中夏太祖方與齊人爭衡結以爲援俟斤初欲以女配帝旣而悔之高祖卽位前後累遣使要結乃許歸后於我保定五年二月詔陳國公純許國公宇文貴神武公竇毅南陽公揚荐等奉備皇后文物及行殿并六宮以下百二十人至俟斤牙帳所迎后俟斤又許齊人以婚將有異志純等在彼累載不得反命雖論之以信義俟斤不從會大雷風起飄壞其穹

廬等旬日不止俟斤大懼以爲天譴乃備禮送后及純等設行殿  
列羽儀奉之以歸天和三年三月后至高祖行親迎之禮后有姿  
貌善容止高祖深敬焉宣帝卽位尊爲皇太后大象元年二月改  
爲天元皇太后二年二月又尊爲天元上皇太后冊曰天元皇帝  
臣贊奉璽綬冊謹上天元皇太后尊號曰天元上皇太后伏惟窮  
神盡智含弘載物道洽萬邦儀刑四海聖慈訓誘恩深明德雖冊  
徽號未極尊嚴是用增奉鴻名光緝常禮俾誠敬有展歡慰在茲  
福祉無疆億兆斯賴宣帝崩靜帝尊爲太皇太后隋開皇二年殂  
年三十二隋文帝詔有司備禮冊祔葬於孝陵

武帝李皇后名娥姿楚人也于謹平江陵后家被籍沒至長安太  
祖以后賜高祖後稍得親幸大象元年二月改爲天元帝太后七  
月又尊爲天皇太后二年尊爲天元聖皇太后冊曰天元皇帝臣

賁奉璽綬冊謹上天皇太后尊號曰天元聖皇太后伏惟月精効  
祉坤靈表貺瑞肇丹陵慶流華渚雖率由令典夙奉徽號而因心  
盡敬未極尊名是用思弘稱首上昭聖德敢竭誠敬永綏福履顯  
揚慈訓貽厥孫謀宣帝崩靜帝尊爲太帝太后隋開皇元年三月  
出俗爲尼改名常悲八年殂年五十三以尼禮葬於京城南

宣帝楊皇后名麗華隋文帝長女帝在東宮高祖爲帝納后爲皇  
太子妃宣政元年閏六月立爲皇后帝後自稱天元皇帝號后爲  
大元皇后尋又立天皇后及左右皇后與后爲四皇后焉二年詔  
曰帝降二女后德所以儷君天列四星妃象於焉垂耀朕取法上  
玄稽諸令典爰命四后內正六宮庶弘贊柔德廣修柔盛比殊禮  
雖降稱謂曷宜其因天之象增錫嘉名於是后與三皇后竝加大  
焉帝遣使持節冊后爲天元太皇后曰咨爾含章載德體順居貞